

दिनांक 03.08.2024

समय: 18.45 बजे

आकाशवाणी जयपुर-अजमेर

प्रादेशिक समाचार

- प्रधानमंत्री नरेंद्र मोदी कृषि अर्थशास्त्रियों रा 32वां अंतर्राष्ट्रीय सम्मेलन रो उद्घाटन कर्या-कह्या- सरकार सुधारों रे सागे कृषि हलका ने मजबूत कर री है।
- मुख्यमंत्री भजन लाल शर्मा री अध्यक्षता मांय राज्य मंत्रिमंडल री बैठक -केई महताउ फैसला लिया जा सके है।
- भारतीय जनता पार्टी रा नया प्रदेशाध्यक्ष मदन राठौड़ आज पदभार संभाळ्यो।

अर

- मौसम महकमा रे मुजब आवता 24 घंटां मांय जैसलमेर, बाड़मेर, जोधपुर, जालौर अर आरे-सारे रा जिला मांय हल्का सूं तेज मेह बरस सके है।

000

प्रधानमंत्री नरेन्द्र मोदी कह्या के भारत बत्तो खाद्यान्न उत्पादन करबा वाळो देश है अर म्हे वैश्विक खाद्य सुरक्षा अर वैश्विक पोषण सुरक्षा रा कामां मांय लाग रिया हा। वे कया के सरकार सुधारों रे सागे कृषि हलका ने मजबूत कर री है अर इण रो उद्देश्य काश्तकारों रा जीवन मांय सुधार लाणो है। आज नुवी दिल्ली मांय 32वां अंतर्राष्ट्रीय कृषि अर्थशास्त्री सम्मेलन ने संबोधित करता थकां श्री मोदी कह्या के कृषि, सरकार री आर्थिक नीति रो केन्द्र है। वे कह्या के भारत मोटा अनाज, दूध, दाळ अर मसालां रो सब उं बड़ो उत्पादक देश है।

.....

प्रधानमंत्री कया के भारत रसायन मुक्त प्राकृतिक खेती ने बढाबो दे रियो है। वे कह्या के बरस 2024 अर 25 रा केन्द्रीय बजट मांय सतत कृषि माथे ध्यान दियो गयो है। श्री मोदी कह्या के सरकार लारला दस बरस मांय जलवायु रे मुजब फसलां री एक हजार नौ सौ नई किस्मां मुहैया करायी है। इण मौके केन्द्रीय कृषि मंत्री शिवराज सिंह चौहान कह्या के भारत री कृषि विकास दर विश्व मांय लगातार सब ऊं बत्ती बणी व्ही है। वणां भुखमरी अर कुपोषण ने पूरी भांत खतम करबा, जलवायु परिवर्तन री चुनौतियां सूं निपटबा अर बढता तापमान री वजह सूं कम उत्पादन जेडा गंभीर मुद्दा रो हल काडबा री जरूरत माथे जोर दिया। सम्मेलन मांय 75 देशां रा करीब एक हजार प्रतिनिधि भाग ले रिया है। इण बरस रा सम्मेलन रो विषय है—सतत कृषि—खाद्य व्यवस्था मांय बदलाव।

00000

केंद्रीय पर्यटन अर संस्कृति मंत्री गजेंद्र सिंह शेखावत कह्या के पर्यटन मांय भारतीय अर्थव्यवस्था ने दुनिया री तीसरी सब ऊं बड़ी अर्थव्यवस्था बणाबा री क्षमता है। ग्रेटर नोएडा मांय सातवीं अंतर्राष्ट्रीय आतिथ्य प्रदर्शनी रा उद्घाटन समारोह ने संबोधित करता थकां श्री शेखावत कह्या के सरकार पर्यटन अर आतिथ्य रा हलका मांय चौखो काम करबा खातर प्रतिबद्ध है। वे कह्या के अंतर्राष्ट्रीय आतिथ्य प्रदर्शनी लारला छह बरस मांय भारत रा आतिथ्य उद्योग ने आगे बढाबा मांय महताउ भूमिका निभाई है।

श्री शेखावत कह्या के देश मांय कृषि अर पर्यटन दोन्यू खास हलका हैं जो लोगां री इच्छा रे मुजब हर चीज मुहैया करावे है। वे कह्या के पर्यटन हलको 2047 तांई भारत ने एक विकसित राष्ट्र बणाबा मांय महताउ योगदान दे सके है।

0000

मुख्यमंत्री भजन लाल शर्मा री अगुवाई मांय जयपुर रा मुख्यमंत्री कार्यालय मांय राज्य मंत्रिमंडल री बैठक व्ही। बैठक रे पछे राज्य मंत्री परिषद री भी बैठक जारी है। बैठक पूरी होबा रे पछे राज्य सरकार रा मंत्रिया कानी उं केबिनेट मांय व्ह्या फैसला रा बारा मांय बत्ती जाणकारी दी जावेला। राज्य मंत्रिमंडल री बैठक मांय आवता उपचुनाव ने देखता थकां केई महताउ फैसला लिया जा सके है। इण

मांय संविदाकर्मियां सूं जुड्या मुद्दा, तबादलां मांय छूट, आपदा प्रबंधन, हरियालो राजस्थान अभियान जेड़ा मुद्दा शामिल है।

000

आज 14वाँ भारतीय अंग दान दिवस है। इण मौके स्वास्थ्य अर परिवार कल्याण मंत्रालय री अगुवाई मांय राष्ट्रीय अंग अर ऊतक प्रत्यारोपण संगठन आज नई दिल्ली मांय अंगदान जागरूकता कार्यक्रम राख्यो। कार्यक्रम मांय स्वास्थ्य अर परिवार कल्याण राज्यमंत्री अनुप्रिया पटेल उण परिवारां ने सम्मानित कर्या, जो ब्रेन डेड ऐलान होबा रे पछे आपरा परिवार रा सदस्य रा अंगदान कर दीना। नीति आयोग रा सदस्य डॉक्टर वी के पॉल अंगदान रा बारा मांय जाग जगाबा बाबत जोर दीना। वणा देशभर रा मल्टी स्पेशियलिटी सफाखाना सूं अंग प्रत्यारोपण री सुविधा मुहैया कराबा री अरज करी। प्रदेश मांय भी इण मौके केई कार्यक्रम राख्या गया। केई ठोडा माथे लोगां ने अंगदान री शपथ दिरायी गयी। नई दिल्ली मांय राख्या एक जळसा मांय राजस्थान ने अंगदान रा बारा मांय सर्वश्रेष्ठ प्रचार प्रसार करबा खातर सम्मानित कर्यो गयो। आकाशवाणी सूं बातचीत करता थकां चिकित्सा अर स्वास्थ्य विभाग री अतिरिक्त मुख्य सचिव शुभ्रा सिंह बताया के प्रदेश मांय दुर्घटनावां मांय हर बरस 10 हजार सूं बत्ता लोगां री मौत हो जावे है। इण भांत रा लोगां रा अंग दूजा लोगां ने जीवन दे सके है। वे कह्या के प्रदेश मांय अंगदान ने बढाबो देबा खातर हर भांत री कोशिश करी जा री है।

0000

राजस्थान भाजपा रा नया प्रदेशाध्यक्ष मदन राठौड़ आज आपरो पदभार संभाळ्यो। इण मौके भाजपा रा सगळा आला नेता मौजूद रिया। इण मौके भाजपा प्रदेश कार्यालय अर जयपुर रे बारे व्ह्या कार्यकर्ता सम्मेलन ने संबोधित करता थका श्री राठौड़ कह्या के कार्यकर्तावां ने पूरो सम्मान दियो जावेला।

कार्यक्रम मांय मुख्यमंत्री भजन लाल शर्मा अर पैली री मुख्यमंत्री वसुंधरा राजे समेत मंत्रिपरिषद रा सदस्य अर सगळा आला नेता मौजूद रिया। इण सूं पैली जयपुर हवाई अड्डा सूं प्रदेश कार्यालय ताई नया चुण्या गया प्रदेश अध्यक्ष रो ठोर ठोर स्वागत कर्यो गयो।

00000

प्रदेश मांय अमृत पर्यावरण महोत्सव एक पेड़ देश के नाम अभियान रे तैत आवती 7 अगस्त ने बत्ता पेड़ लगाया जावेला। शिक्षा अर पंचायती राज मंत्री मदन दिलावर आज आकाशवाणी ने दिया विशेष साक्षात्कार मांय या जाणकारी दी। वे बताया के यो अभियान शिक्षा विभाग, पंचायती राज विभाग अर राज्य रा दूजा महकमा रा सहयोग सूं राख्यो जावेला। श्री दिलावर प्रदेशवासियां सूं अरज करी के वे पर्यावरण ने बचाबा खातर बत्ती संख्या मांय पौधा लगावे।

.....

शिक्षा मंत्री रो यो विशेष साक्षात्कार काल आकाशवाणी जयपुर—अजमेर सूं संवारे सवा नौ बज्यां प्रसारित कर्यो जावेला।

इण अभियान बाबत प्रदेशभर मांय केई तैयारियां करी जा रही है। मुख्यमंत्री वृक्षारोपण महाअभियान “हरियालो—राजस्थान” रे तैत 1 सूं 8 अगस्त तांई चलाया जा रह्या सघन पौधारोपण सप्ताह रे तैत आज नगर परिषद जालोर कानी उं भगत सिंह स्टेडियम मांय मानव श्रृंखला बणा र पर्यावरण संरक्षण रो संरक्षण दियो गयो। इणी भांत नगर परिषद कानी उं शाह पूंजाजी गेनाजी स्टेडियम परिसर जालोर मांय पौधा लगाया गया।

0000

जगद्गुरु रामानंदाचार्य राजस्थान संस्कृत विश्वविद्यालय मांय केई पाठ्यक्रमां मांय दाखिलो लेबा खातर आवेदन री आखिरी तारीख 18 अगस्त तांई बढा दी है। विश्वविद्यालय रा प्रवक्ता शास्त्री कोसलेंद्रदास बताया के केई पाठ्यक्रमां मांय विद्यार्थी हाल बढी हुई तिथि रे मुजब ऑनलाईन आवेदन कर सके है। शास्त्री अर आचार्य कक्षावां खातर वेद अर पौरोहित्य, धर्मशास्त्र, ज्योतिष, साहित्य, व्याकरण, दर्शन, जैन दर्शन अर विशिष्टाद्वैत वेदांत मांय आवेदन करबा रो विकल्प विद्यार्थियां रे कन्ने है। योग विज्ञान विषय मांय बीए अर एमए कक्षावां रा न्यारा योग, ज्योतिष अर कर्मकांड अर पीजीडीसीए जेड़ा डिप्लोमा पाठ्यक्रम मांय भी विद्यार्थी आवेदन कर सके है। विश्वविद्यालय मांय बीए अर एमए पाठ्यक्रम खातर आवेदन प्रक्रिया चाल री है।

0000

भ्रष्टाचार निरोधक ब्यूरो री प्रतापगढ इकाई कानी उं आज कार्यवाही करता थकां संयुक्त आयुक्त अर महाप्रबंधक प्रतापगढ जिला उद्योग केन्द्र रा महाप्रबंधक राजीव गर्ग ने 3 लाख रूप्या री रिश्वत लेता

थकां गिरफ्तार कर्यो। भ्रष्टाचार निरोधक ब्यूरो रा महानिदेशक डॉ. रवि प्रकाश मेहरडा बताया के ए.सी.बी. री प्रतापगढ इकाई ने परिवादी कानी ऊं शिकायत दी गई के सातवां वेतनमान रा स्थिरीकरण पेंशन प्रकरण रो भुगतान अर एरियर रो भुगतान करबा री एवज मांय आरोपी ने 3 लाख 50 हजार रूप्या रिश्वत राशि री मांग कर परेशान कर्यो जा रह्यो हो। इण माथे एसीबी री टीम आज कार्यवाही करता थकां आरोपी ने रंगो हाथों गिरफ्तार कर्यो।

00000

प्रदेश मांय कुछेक ठोरा माथे चौखो मेह बरस्यो। जैसलमेर रा गांवाई हलका मांय आज जम र मेह बरस्यो। जिला रा सम, कुलधरा, कनोई, सलखा समेत केई ठोडा माथे मूसलाधार बारिश व्ही, जिण सूं खेत खलिहान मांय पाणी भर ग्यो। वठीने तालाबां मांय पाणी री चौखी आवक व्ही। म्हाका संवाददाता बताया के भारी मेह बरसबा सूं केई ठोड़ा माथे सड़का टूट ग्यी, जिण सूं लोगां ने परेशानी व्ही।

.....
मौसम महकमा रे मुजब आज दक्षिण-पश्चिमी राजस्थान रे ऊपर कम दबाव रो क्षेत्र बण्योडो है। इण रा असर सूं आवता 24 घंटां रे दौरान जैसलमेर, बाड़मेर, जोधपुर, जालौर अर आरे सारे रा जिला मांय हल्की सूं तेज बारिश होबा अर कठे-कठे भारी बारिश व्हे सके है।

.....